

Cabaran Mahathir terhadap Komanwel berani dan tegas — Tokoh2

KUALA LUMPUR 18

Okt. — Tokoh - tokoh politik dan golongan akademik hari ini menyifatkan tindakan Perdana Menteri mencabar Pertubuhan Komanwel supaya mengkaji kewujudan dan fungsinya sebagai pelindung negara - negara anggota serta sikap aparteid sebagai berani dan tegas.

Ketua Pergerakan Pemuda MIC, Senator D.P. Vijendran berkata, ucapan

Datuk Sri Dr. Mahathir jelas menunjukkan keberaniannya dalam menyuarakan pendirian Malaysia terhadap masalah - masalah dunia dan sudah lama suara lantang seumpama itu tidak kedengaran di kalangan ahli - ahli politik.

“Walaupun terpaksa berdepan dengan negara - negara gergasi yang lain dalam pertubuhan itu, tetapi Perdana Menteri tidak gentar dalam menarik pandangan serta perhatian ne-

gara - negara anggota khususnya dan dunia amnya terhadap penindasan dan kekejaman yang berlaku di Afrika Selatan dan Namibia.

“Saranan Datuk Sri Dr. Mahathir supaya pertubuhan itu mengkaji semula peranan dan tanggungjawabnya memang tepat pada waktunya. Ia perlu mengkaji sikap acuh tak acuhnya dan membuka mata serta mengambil pendirian hal ehwal luar yang baru sejajar dengan matlamat penubuhannya.” tegasnya.

Beliau berkata demikian sebagai mengulas pendirian Perdana Menteri semasa berucap di Persidangan Ketua-Ketua Negara Komanwel (CHOGM) di Nassau, Bahamas semalam bahawa ia lalai dan tidak harus wujud jika enggan melakukan sesuatu untuk mengatasi masalah - masalah dunia.

Sementara itu, Profesor Madya Murugesu Pathmanaban pula menarik perhatian, dasar aparteid yang diamalkan oleh kerajaan Pretoria pimpinan rejim kulit putih di Afrika Selatan adalah bertentangan dengan nilai - nilai manusia dan hak asasi mereka.

Sehubungan dengan itu, jelas beliau, adalah tidak wajar bagi kerajaan itu menindas golongan majoriti kulit hitam. Dalam hal ini pertubuhan itu yang dianggotai oleh negara - negara bekas jajahan British, harus membuktikan ketegasan dan keberkesannya.

Mengenai teguran Perdana Menteri yang jelas ditujukan kepada Britain, beliau menegaskan, sasaran dan teguran Datuk Sri Dr. Mahathir adalah wajar walaupun ia bersifat keras dan tegas. Tetapi itulah satu - satunya cara untuk menyampaikan pendirian dan menarik perhatian demi kebaikan.